

歇

菴

集

歐庵集卷之七

皇明朝列大夫國子監祭酒會稽陶望齡 著

門生喬時敏校友 謝伯美 陶爽齡 訂

商 濬 陶祖齡 閱

序

周太夫人壽序

昔海門子游於柯山諸生從者二十人酒酣海門子左右顧而言幸哉諸君子之事於道也盍言所以事者諸生起對畢則請先生所爲海門子曰孝

弟時海門子以賀萬壽節歸念母夫人年高將拜
章句養座下生退而言曰如先生所謂行有其言
者乎既得請周旋子舍又五六歲弟子日進先生
口所談論身所發揮滋益較著然大指不過孝弟
兩言而已而太夫人齒亦愈高以萬曆乙巳稱九
十先是望齡謝官秩歸謁海門子於剡剡諸生大
會講堂以壽言爲屬既返越士之遊先生者若而
人又以爲言望齡曰諸君亦知先生所以尊親之
大乎有人於此襁褓而農也主是而公也其親則

農之公之矣有人於此鄉人自謂也人謂之鄉人
謂其親鄉人之親聖人自謂也人謂之聖人謂其
親聖人之親鄉人聖人其親者其榮辱親直襁褓
圭冕而已哉夫大榮大辱之介人情所明也然而
不爲者未得其爲之方也有五穀於此襁褓而御
之號曰農夫之養圭冕而御之號曰王公之養所
御有異哉所以御之者殊盱江羅先生之言曰人
不知道孝弟徒鄉士之次人能知道孝弟卽聖人
之大孝弟五穀也或爲鄉人或爲聖人則御之者

異也吾觀東京以降至於五代史冊所傳獨行孝
義其奇節至性相望先後世不乏人而聖賢不少
槩見及記言文王聖人之孝又特問寢視膳小文
庸行而已以爲孝弟異耶聖凡同耶吾不知也斯
民之生久矣皆以聖賢之人行聖賢之行而獨無
聖賢之覺汶汶昏昏賢者安於鄉黨自好之節而
不肖者爲戾爲逆爲妖爲沴使孩提不慮之良局
鏞蒙昧無絲以自見夫身爲鄉人而戮其親爲鄉
人之父母斯不亦悖德不仁之甚與當世之士皆

知美仁義尊堯舜高推其名而不居其實故孟子
曰仁之實事親是也義之實從兄是也堯舜之道
孝弟而已矣世皆精言神化深極性命而不知神
化性命之實故程子曰孝弟之至通於神明孝弟
卽神明非有二也知此者所謂覺也覺此者所謂
聖也海門子其先覺者乎故燂湯調飯抑搔扶持
恂恂唯唯安以其身行堯舜文王之道而不疑視
其親爲堯舜文王之親而無所讓又願與當世共
臻斯道油油然樂其我從也詩所稱孝思錫類其

海門子之謂與太夫人設悅日在某月刻俗上屬
常以歲首諸君期以上元日集於先生之堂稱萬
年壽夫正良月也望盈數也大夫人之年其如春
方來月方恆乎夫尊先生以及其親諸君子之事
師者厚矣若厚其身以共尊其親海門子之教也
吾願與諸君子交勉之也

錢太母九十序

歲丙午仲冬吾友錢伯濟大母胡夫人九十降辰
其稱未亡人者六十歲矣如蒼松老檜飽霜雪戰

風雨以養其干霄剗漢之勢與節俱長與寒俱老
自其拱把而十圍百尺皆拄撐凌厲閱百罹衆悴
之日也夫人少卿塗山先生從孫女也三十而寡
撫孤持戶仁足以柔強禦知足以理焚難禮足以
修嫺睦莊足以行慈愛義聞於諸姑教行於家術
始丁衰祚飭蠱持危產則滋殖既老視聽聰明子
孫曾玄嬉舞植立雖然肅然愛著乎外儀結乎內
姻族州黨望爲女宗斯已盛矣制婦節年至六十
得旌閭而夫人九十其家人貲力無足以聞於

司采風者略焉是歲伯濟罷試京師跨衛數千里
歸爲母壽而謁言於予豈予不文足以揚母之義
於無窮時耶然伯濟嗜學求師友半天下家有石
師舍之而他求乎夫學始乎止成乎貞卒於昭明
光顯而已易之咸言止說其德爲女女而婦故繼
以恒恒者婦之吉德也故曰恒其德貞婦人吉婦
而母故又繼以晉晉下體坤坤者母也明出地上
德成而光照乎外故晉之六二曰貞吉受茲介福
於其王母王母者又母之成也今夫人婉聽之美

存於衿縞可謂止矣恒道久中義從乎一可謂貞
矣眉壽無疆施於孫子可謂介福矣夫人自女而
婦而母而王母躬所履踐皆易也今吾與子信道
不篤若醒若昧趨雖聽矢動有羊岐情以割而更
屬理如繫而常馳而圖以自昭明德庸可冀哉其
病在不恒始於不止夫遠乎止止之吉而卽乎不
恒之差然則貞之說吾與伯濟所宜亟講而伯濟
之大母抑亦吾之師也而予又有感焉當今人謠
士行其遜宋唐者多矣然閨門之節匹婦之所龜

勉里有陶嬰之歌俗勵再庭之恥美逾二南風高
三代積化相染幼成相喻由斯以言謂世漸漓僞
黃虞不可還真誣說也哉

壽趙年伯母尹太夫人序

古之交者莫重乎世父之友或拜於車左於牀下
友其子者或拜母於堂甚者始定交焚香告於家
廟其重蓋若斯也陳太丘荀朗陵之相過從兩家
之子將車行酒趨若僕隸雖幼在提抱罔不車攜
膝擁環迴賓主之側忻忻然同於一氣讀其遺事

未嘗不想其風而慕之望齡之大人自少時偕少
保端肅公舉於鄉以操趨嗜好相交好併肝一腸
但異耳目隆慶末大人爲太僕獨望齡泊仲兄從
詣京師時端肅公方副司空過邸中未嘗不侍左
右因具酒食召令入內屬夫人主之夫人撫其頭
曰郎君年小去母獨從父游良苦夜寒誰爲覆被
者不致凍乎是時望齡年十一兄年十三公雅齒
其間夫人弟最釋皆兩傍侍坐時去鄉歲餘視夫
人如見母依依不忍舍去後大人遷南大理端肅

公復來長御史臺兩廨相隔一墻耳夫人與予母
皆聲相聞又數年竝爲南尚書於是公雅與予兄
弟皆長勝衣冠矣遂相與同讀書春官衙舍中夫
人弟亦在焉然未嘗得拜謁夫人如曩時而旣稍
有知識於公雅日聞夫人所爲母於夫人弟聞所
爲女絲毫皆悉端肅公每過學舍予兄弟泊公雅
尹生俱趨而侍語必移晷大人至亦然兩家情若
左右手忘其異姓今每追憶其事竊較古人卽荀
陳詎有異耶望齡與公雅旣同朝仕復同養親家

居歲丁酉十月爲太夫人八十壽旦而家大人亦以是歲正月觴於鄉人兩家先後各持羊酒相慶喜鄉之先生若干人僉謂曰若兩君者宜交祝而可對曰望齡奚敢比於公雅公雅富材藻蔚然以騷雅名於時望齡不文一也伯母夫人老而康起居如平時望齡之父耄矣其不敢比有二者諸先生曰子不聞乾坤之義乎乾至於老必亢故用九曰不可爲首坤則不然於用六則曰以大終也夫人坤之德也其相端肅也靜而一字公雅也慈而

恒所謂地道無成也以竟端肅之緒代之成終大孰加焉享有耆壽純固難老終孰大焉若子之大人用其神勞矣其壯衰之異不亦宜乎且子詞官也又不得辭於是敘其世交以復於諸先生而佐觴焉

陳母壽序

萬曆乙酉予從禹門子舉於鄉是時越士同舉者參制額之一號爲甚盛後升禮部纔十人若食肉於朝歸有母遺又纔數人而已禹門子最新貴持

丹獻斷譽於西曹中又奉使指乘傳過家顧予於
鏡湖之上再拜而言曰是秋也吾母歲大耋吾馳
四千里及於一觴賓客之辱於吾者詞且曰使而
母有無疆之年雖然吾有旨乎詩人之善祝也其
言曰樂只君子遐不矜壽樂只君子德音是茂先
之以介矜壽矣又重之以昭德音人之親有美弗
章不可謂茂德不茂不可以謂無疆內言不外吾
懼吾母之德弗昭也敬謁子言以昭之吾陳右族
也吾父幼慧書過目輒誦通經史嫺文章邑中稱

爲奇材惟吾父吾母亦竊相謂青紫不足拾也已而廢業有二子蒙稚敏不及父母傷吾父負奇不就而憂二子之弗荷也曰業其在勤曛時塾歸母張鐙而紡二子傍誦必懸果餌以勸誦母每夕紡有程恐二子逆畏其久而媮也故度其程十二三約曰竟之而寢及竟又私出其廋者曰勉誦此易竟耳每食塾師雖鮭菜必嘗旨否手滌盂必潔吾父年長出爲後所後姑晚瞽病不知人洩便皆抱持涓除之如是三年無倦色也與娣姒盡讓臧獲

盡慈子旣薦人曰夫人曷能無鮮衣對曰非習也
老織作不罷人曰夫人休矣對曰少習之且以銷
日也吾觀詩所稱絲枲蠶績之美及世傳允參畫
荻事皆閨門恒務里巷所時有其鉅也至垂諸經
緯著於傳記有以載之則傳不則泯泯吾故願子
言之昭之也予曰鄙人言奚能爲昭夫人令德
在吾子禹門子刑官也古有良於獄惠於民若於
母訓人賢其母而稱之者雋母是也有能於官健
於斷拂於母訓人亦智其母而稱之者嚴嫗是也

二母者後世皆有聞所以聞則異矣夫載之以尊位加之以顯功以揚其親若美錦而旌之何患於聞在慎其所以聞者禹門子敦厚而明決廣中而恕施吾知其爲雋必無爲嚴也然禹門子長於春秋傳春秋母子並稱惟辛舌氏而已叔向之賢而智不逮母然則禹門子將奚師哉奉若母訓以光昭其令德步趨焉可也享之有樂也伶致語予詞其比于優伶乎

壽常太師母王老夫人序

庚寅吾師心吾先生卿太僕奉其太夫人京
邸時春秋六十有七矣設悅之辰其門下士羅應
斗等若而人咸得造榻內再拜望見上卮酒爲壽
而望齡稱引詩人松栢之義爲詞以獻明所以成
節而昌其子者其難有若此退而交語所見相賀
曰斯真詩所稱壽母者與旣而先生開府兩浙謝
事歸養又十餘年而夫人壽以大耄門人武部郎
沈朝煥比部尹三聘嚴正邦起部陳美暨望齡官
都下者五人函幣走江夏而申之以言曰古之君

子所以養親者甚棘矣伺其苛癢而抑搔之後先其出入而謹扶持之滑甘膏和以忠養之微至於奉席斂簞紉箴燂潘而精至於無形無聲童而老寒而燠沫爽而日入罄其志力悉其神情以效諸親焉猶患弗給也而暇其他哉然出告反面無易方過時以致愛也而事君不可以不忠無登高無臨深無游無徑以致慎也而戰陳不可以無勇尊之以名而後大博之以施而後靡置焉蓋節纖備道宏遠莫甚乎孝當歆菽飲水鞠脰膝下能其纖

者備者而未免三釜之願事君顯名之思既致於
宏遠矣又興懷行役陟岵而瞻望歌翩離而不得
返又未嘗不怒焉自失也然則二者之道蓋交違
而不能兩獲也明矣先生始以數歲孤兒母子依
恃志盡力竭以樂其單畸而意豈嘗一日安於是
哉慮欲成先人之雅志昭母氏之徽烈樹功底業
傳諸無窮以庶幾尊親不匱者及翱翔禁近出擁
百城祿豐養備令名顯聞以奉太夫人於官亦既
有懌志矣然心煩於簿領而力敝於籌畫卽朝夕

燠寒之間未有廢焉而所謂至精而微者猶患乎
志岐而未盡力判而未併也迨釋兵柄歸田廬致
臣而予舍憔悴形而操柔色謝纓組而佩紛觴於是
先生始得專氣一神精厥視聽篋枕而御輿浣裳
而請醕而靡有分焉蓋驅馳鞅掌行年五十而始
獲還其爲童孺之身夫童孺之愛誠愛而樂真樂
也且十禩於茲矣其効諸太夫人者不亦侈哉方
先生宦游太夫人時以似續爲慮及歸連舉二孫
含飴之歡倍於祿養夫孝子弗敢有厭身曰維親

杖弗敢子厥子曰親之後受爵祿曰致諸親也功
成譽顯則曰親之令名先生斂時五福以事親靡
不具矣乃不敢有而歸諸太夫人其古所稱爲人
子無以有已者乎望齡於先生樂其孝德之備兼
乎弘纖而知太夫人之受祉未有艾也故喜而爲
之詞若其媿節隆義則曩固言之矣

壽外母金老夫人序

萬曆丙午春正月三日爲予外母金夫人八十壽
辰望齡偕陳君某王君某朱君某相與載爵爲祝

望齡嘗觀家之將興其積美之本必有一人鍾之
鍾之必於其女德女者地象也萬物於是乎生女
德之盛在濡柔在專靜在廣博濡柔專靜廣博者
生道也地之德也執生之道食地之德於女爲正
位故曰女正位乎內商之興也詩人本於玄鳥玄
鳥者莊周所謂紛紛猗猗而似無能進不爲前退
不爲後食不敢先嘗必取其緒其易稱無遂詩稱
無儀之義乎玄鳥之喻敬戒也鳩之喻拙也鳩鳩
之喻均愛也一也簡狄有玄鳥之德焉是以降而

生商會稽之商自外大父外父至邵武君簪紱四
世顯融富貴於越無偶望齡逮見外大父母嘗謂
太僕與大理二公高朗弘毅君子也陳淑人聰明
嚴肅人也子孫多材慧富文采拓基續緒繼繼繩
繩如柯葉之扶疎英蕤之灼爍可謂甚盛而竊意
有潛於膏滋行於根撥居不可見之地以爲積美
之本固往緒昌來祚者實在吾外母一人外母所
事剛以柔遇之所配敏以拙承之所字多賢以朴
先之夫剛毅材敏賢智毗於陽者也其道間張發

舒非得至柔至拙至朴者凝而翕之將有發而易
散之患外母明足綜務而貌和識足宜家而外瞻
生平所見惟煦然慈愛人與退然不敢爲先不敢
爲後之意而已與人處惟恐無損於已與人語若
恐傷之豐約無二致壯老無二容所謂無儀無遂
母實有之夫水弱故巨於萬物其任萬石之舟如
浮芥也海下故王百谷其吞衆派如涓勺也母有
柔道福祉所委將焉辭之其壽考寧固固其餘耳
望齡年十九從外父母於京邸母憐其孱弱將護

特至飲食視其嗜者衣擇其鮮好者嘗食簞笋偶
言簞笋旨在於杪及適館啓橐得笋皆杪也餘事
率類此爲諸生時貧母與銖則銖與兩則兩絲毫
皆母賜予及入仕竊升斗亦靡不煩外家今且二
毛矣母嫗憐我無異孺子而予亦時依依母前且
忘母之旣耄也夫陸居者無以語大地之廣博濕
處者無以測江湖之浩渺而予烏能言吾外母之
德哉然母所繇集祉於躬垂裕於孫子者惟是若
拙若朴可望不可知不可知不可言則予之無能名

乃溪於名者耳三君其共述玄鳥之章以侑爵焉
可也

全母壽序

大儒之起詞曹如求天馬大宛之野多厥種焉自
望齡隸是役也而邁其盛其焯然以道德文采踵
襲跡仍映曜於先後者於未戌間有二公曰廬陵
鄒四山先生明州全玄洲先生咸祖孫相繼領史
職著聲譽爲詞林一時盛事其世有嘉祉壽考簪
紱之顯茂大江以右浙河以東無爲兩家叅

維茲歲二月鄒先生拜疏歸壽其二尊人特予休沐其四月全先生持使者節封趙亦以間歸明州奏一觴於堂而先生猶上有祖母丁太夫人春秋七十六而康其壺德相學士公顯者也於是詞曹諸先生洎縉紳能言之士兩榮其行爲歌什文辭投贈者相埒而又以太夫人福德最隆異故益推明先學士休烈太史之孝養而歸美焉其言尤嫻麗過於廬陵而先生意猶弗慊曰誰爲我具悉詞事太夫人其無逸美吾以爲祝乎謂望齡里閭後

進其可遂牘而授之不得辭也其詞曰明州大海
所環匯其氣靈淑必鍾之人鍾之必其德類也夫
海之爲德善受善同善下衆川怒盈奔躍漲溢迨
其道嘉門而經落伽挹然而已不爲升勺加者混
淪溟莫歸於大同長百谷蕃萬族而無私與讓焉
自太夫人歸於全而學士遂由公車升歷金華白
虎之列躋於卿貳太夫人亦膺綸誥日貴重無幾
何而有孫代興人愈張太夫人願愈降縞衣綦巾
不知爲貴人也者可謂善矣撫諸子融融穆穆

無幾微先後同異之感可謂善同矣自宗黨外姻
下迨臧獲待之皆有恩意諸臧獲皆白首依事太
夫人無肯舍去者可謂善下矣斯所稱德類者與
海擅三德江湖藪澤輸焉斯亦百祿繁祉之所委
輸也齡聞之家之昌明其必有人於先後之際光
啓厥祚而卒相之壽考寧固植其本而食其實美
之所鍾也在易坤爲婦道故曰有美舍之無成而
代有終天實鍾美於是太夫人又舍之其有終孰
加焉夫學士公之未究於用天下所同歎也將大

償之於先生太夫人其愈難老以身享介福觀其
成乎先生之克受厥成是學士公之成也先生能
終烈祖之休業以及太夫人而曰太夫人以坤道
代終其誰謂不可先生逡巡謝曰若子之言僕烏
敢任也昔吾祖游於宮太夫人常留事余曾大母
曾大母嘉其孝而祝之曰吾無願於爾也使爾子
孫年壽似我而已蓋曾大母壽幾百歲而今太夫
人七十餘神色益王庶其過之且吾昆弟以降指
甚繁吾又竊祿於此得望前人踵武祝其驗耶太

夫人之孝德章矣雖然吾未嘗見其喜於色故願假靈於子言望齡曰今者車馬歸而東里先生衣綵繡持節差大官酒脯太夫人被翟翠坐堂上受觴念學士曩事宛如目前卽太夫人善爲受生平無喜色將必爲先生一解顏哉儻幸爵而以齡代終之說進亦當許其不謬矣

王母壽序

戊子歲望齡偕同年王晉伯待試京師講業罷相攜步游東城隅呂公堂申因共咨歡言家有老親

卽微寸祿幸甚非然者吾不忍老人之懟也望齡
曰子之二親視吾父十年以少且伯父壯甚可勿
憂晉伯曰不然吾父雖幸健而老母室於牀自少
時固已然矣明年同試禮部晉伯獨罷歸望齡送
之曰勉矣以子之材無愁祿養也而晉伯今更再
上猶弗偶伯父又棄養惟母夫人向所謂善病者
今更少壯耳望齡曰有是哉夫病固不廢壽慶讚
勞慮吉凶修短化如轉轂孰能揣之哉吾子獨不
憶曩者之言耶子之親其衰若壯孰審於子者而

於今且何如矣又况其外者乎當吾子聲譽籍起
越人數其士之薦於鄉者指初僂也稍稍淫滯以
至於訕今舉與訕且再變此不獨鄉人爲然卽子
之二親且疑之矣夫據一成之跡者難與稽屢遷
之化此在父母與子且不能相知而况其疎者乎
君子之嚴其親也如天其事天也如親東西南北
惟命之從其義一也吾子其順天以順其親夫天
之不可犯也而算得謀失醜窮慕通曰吾非身是
圖實吾親是爲吾未聞未能事天而能事親者也

孔子曰歔菽飲水盡其歡可以謂養矣吾視晉伯
雖屢擯窮困而色恒愉愉然未嘗以貧故廢其親
甘芬之奉夫持子愉愉者以養母夫人將旨於五
鼎而况薦之甘芬哉且吾子不測壯衰安測窮通
人情喜壯而病者多壽人情慕通而詘者多信斯
亦天也然則太夫人固宐難老晉伯固宐大信其
一徵矣又奚疑乎太夫人七十之辰在某年某月
後期而賀以俟太公之禪望齡所爲煩舉其詞勗
晉伯者懼晉伯未釋於菑堂之吝也然晉伯學且

新而豈猶然嚮者已乎同觴者年家子幾人名如左

劉母壽序

幼安初舉南省也與望齡居比牆數見相與語惻然若思者詢之故曰母老無異兄弟曩者我每出無幾月也而念我目腫矣今如何頃之當選士入中祕而幼安就望齡謀欲上疏求一小郡博士曰以近吾老母足矣堅弗肯應強之試中選非其志也於是走役夫數千里以安輿迎太夫人來時同

舍生二十餘人得奉其老母于茲者幼安一人而
已望齡過之而再拜從容言曰幼安土方其未遇
心怦怦亟欲得三釜粟曰匪君也而親烏乎養矣
迨身已受祿見委任經營四方將旦日寧處而不
可其暇顧父母養耶昔先王之盛也其仕者宣力
在公而忘其家恤於是君錫之詩以勤之曰王事
靡盬不遑將母蓋勞慰焉耳已及政衰而多役羣
臣不勝其憊而至動於怨誹曰有母之尸雖蓋憂
思焉耳已爲君者若不能假其臣一日之便而臣

若者不能致其親以一日之養如此則是身貿祿而仕易親其又何賴焉幼安幸遭邁盛際當海內澄晏以文學顯用不與于四方之事余見諸先生居茲職無故輒數十歲足無踰都門外也而子之太夫人復康以壽怡怡于日享大官廩食歸公朝而子舍爾其與執掌盡瘁勞歌而靡及者不亦逕庭也哉夫士所以自盡于上者其神情而力次之情所不得禁聖人因而遂焉故善畜下者務養其情而不善者盡厥力夫母子之間至矣彼其子

焉睠懷形拘而神往有岐心焉所擗擗而效於君者終外也士之仕於今無不得遂于上者而顧或奪於私家之勢其以斗祿而去其親不事者亦多矣此于事君也且簪亂而不獲盡非有愛於力神情使然也國家設文史之職特優閒之蓋寘其力而專于心其神情尤要焉幼安外事主而內奉老母視寢膳樂甚神無撓焉其益以休暇討有邦之故實而稽驗之求古今之善敗而叅伍之儲之侍之乃大施之異日所能竭其情于上者必幼安也

以光顯太夫人太夫人其亦情愉而神王算未量
矣幼安其勗哉於月之七日爲太夫人六十誕彌
之辰同年友人偕讀祕書者若干人爲曹以壽屬
詞焦弱侯以春秋偕舉者若干人爲曹以壽而望
齡申其言如此

周母壽序

吾同館兄弟之及養者皆有一言以爲其父母壽
也卽墨周季平不及於親養矣而吾諸兄弟猶相
率壽其伯母孫太夫人季平獨得以伯母壽者夫

人雖名季平伯母而實母而又有難爲於母惟季平所以事夫人不敢二惟吾黨所以事夫人不敢二於季平之母此吾兄弟今日所稱壽義也季平之言曰砥年九歲二親見背有兄弟妹各一人皆幼穉恃伯母活母又有弟二人姊二人緦衣裳組履襪取辦手指煩碎勤瘁未嘗有幾微倦苦分甘賦少有先不後砥家村聚就經學郭內每時日歸省母母未嘗不持之涕泣誠哀其孤露不欲令暫離已恐有失宜蓋季平言至此而不知淚之交於

面詞之不能竟於口矣昔魯義姑棄已子而全兄
子其名奮于鄰國著諸列傳夫義姑事誠難然特
信其一日之決耳若夫至細易怠至久易渝至痛
難假而夫人所處非旦日一決之力也其爲義尤
難於魯義姑世有更生則夫人事固空錄而况隸
在史職有記載之責者乎此又吾黨所以樂爲夫
人言者也吾聞均天道也均者得天天表之應應
亦以均今季平與弟襄陽君升華陟巍踵襲跡仍
其嗣興者尤未艾也母所以愛其子與其猶子一

衡而授之無爽焉天所以隲其子與其猶子一量而受之無爽焉母契天耶天契母乎此世俗所共羨於母而吾黨得以侈言者也季平又言吾伯母幸以弟最與上封典而砥亦以母教有今日卽吾伯母貴而不自砥卽砥幸邀恩數而終不能逮吾伯母所以庶幾酬萬分一惟吾子片言吾謂夫人所以視季平兄弟直忘其孰爲已子與非已子而季平兄弟亦忘其非同生也久矣則夫人之以襄陽顯何必非季平季平顯其二親何必非夫人

哉且望齡之言奚爲雖然齡與季平又俱溫陵李
先生所舉士也咸謂爲夫人祝莫宜望齡此又望
齡所以申其詞而不得讓者也

牛母壽序

田生之言曰非君土無以處親非君祿無以養親
非君爵無以尊顯親受之於君致之於親凡事君
者以爲親也夫投質而委四體受命而忘家室古
之人蓋有勤勞於行役咨齋瞻望不可顧其親養
者而求世爵祿之士縻不可去輒引義勉自裁決

曰吾業已倍親而事君矣可若何夫事君以爲親
與倍親而事君其說相去詎千里已哉如此則君
與親其不能交重而並得也久矣仕而獲以均重
于君與親無如我 本朝吾聞有爲養仕者未聞
有仕而難于養者也有之惟今御史爲然御史迭
出遞代久者八九歲單車詣部坐郵舍中左右盼
介焉無僮僕與語老親家居歲時安否問訊不輕
得達蓋使者之隆重無甚乎是而其辛苦羈歎心
惓乎簿領形瘁于馳驅懷鄉土而瞻庭幃與古所

謂靡盬不遑步屺瞻望者未有異也蓋王者之馭
臣下禮隨其輕重而心同其愉戚豈以御史任最
隆重而數因頓之不計以慰藉其意殆必有道矣
比者有上言憲臣卽受命宐馳赴所部義不宐反
顧家有所濡滯而廷議以爲人情所難解聖王不
禁者以體下也宦而還其帑久遊而覲省其父母
於人情宜於是爲御史著令在驛程內例得歸省
無幾時而春宇牛公奉詔視兩浙旋車函谷衣繡
持節拜母夫人於堂下稱觥之禮適與期會斯又

難矣惟

天子仁孝旁錫式崇耳目之任肇有

休命惟公祇敬淵洪克和有家克協有邦實首承
之公其可不厚崇節以顯揚無前寵施致諸太夫
人太夫人其懋對 天子之休嘉以受公觴卽
勉王事靡或寧居太夫人且有餘懌而公亦大慰
於厥心居者康而無念行者行者安而無爲居者
思壹精慮展支體以造我海邦亦幸矣哉公之將
歸也不知予蒙鄙而屬之言予浙民也幸以史職
隸輦下新有聞聽故爲推明朝廷德惠聞我公致

親之光寵有異曩者亦以安公之恩慮而望其垂
於行以慰我浙人也

壽詹母江恭人序

萬曆乙未予從史職居京師詹生光仲以其尊人
觀察公命來就予授經義戊戌光仲復偕其弟休
倩來學會稽辛丑再來其小弱弟沈從乙巳二詹
生又與余弟君爽同學山中前後凡三至會稽以
母恭人命來者再恭人亦屢用刺繡紛悅果餌脯
腊遺予太夫人通好若婚姻家丁米予居天永山

中休倩從武林來言淇老母春秋六十夏六月爲
生朝惟先生一言佐觴政予時新有綺語戒將屏
絕筆研而與休倩兄弟遊久不可以辭則令臚其
事而受詞焉休倩之言曰恭人事姑三十年無忤
色和於妯娌慈於娣姒其歸不娠者數歲耳遽置
沈母後生沈視沈若凍淇也課三子嚴淇兄弟無
敢居內內三日恭人輒見辭色其老也歸沈母以
政然不以老委政故自媿躬視紡織夜分而寢先
君子少好學悅姚江先生之言手挾書雖燕不廢

偶出外未返橫書几上恭人必盥而藏之其嚴敬
知所崇尚類然也曳布服縞老無所改年四十時
昆弟羣從僉賀先君子爲謀曰孺人何服而俠拜
客乎爲縫新衣纔得紅布一端恭人戒客無以具
貸數百錢以饗貧儉若此今先君子捐館人淇等
無似莫慰母心先生幸惠以言是吾母被繡衣袞
以見於賓客也予曰語有之越雞不能伏鵠豈不
信然將子兄弟之器大僕之能薄乎不然何三就
予而猶無以竟子之志耶雖然子亦聞古之三母

乎有湛母者解髮爲髻剉薦爲秣以燕於朋友是
教子立名譽顯功樹業於當世者也有孟母者操
刀裁織而警子學是教子儕偶賢聖成章而達者
也尹母之言曰令爾祿養無寧善養是教其子遜
志學古無以爵祿內撓其心者也子之兄弟亦嘗
聞先儒之訓矣緒呈而未續水漸而未盈暗於道
德遠於聖賢恭人所爲受爵而未甚怡正坐此耳
若名譽之章榮祿之厚湛母所深願尹母所深恥
豈恭人之賢而介然於區區者哉僕年往學荒方

入山求友畢所懷願啜菽飲水事我太夫人以庶
幾古人善養之義而未能也子之先君子有素尚
恭人聞其說尊其書諸君安得舍此更求悅親之
方乎休倩曰唯唯遂錄其說歸爲恭人壽

壽外嫂鈕孺人序

仕宦於朝分曹列署以處羣四海九域之人以爲
之朋其交鶩之塗寬然而可以無阨然一官之聯
一技之用往往啓闢而召妒又况牀第昵邇新故
盛衰之際脣稽耳屬日媾於前者哉語曰士入朝

見嫉女入宮見妬平居號爲賢人君子相誨以公
相講以容介然細故至僚友動色甚而相圖者多
矣而厚以望於婦人女子曰而無恤我後嗣夫立
於君之廷國論所繫其安危之故豈直家祀而已
哉居寬地行廣塗無以相容相讓至於傾軋兇兒
女恩怨縈縈於尋丈其容與讓不尤難能歟然有
優爲之者其賢固倍於當世號爲賢人君子者也
鈕孺人吾外兄半堃商君元配而前給事中石溪
先生孫女也其歸半堃君生子旣長大孺人曰吾

子好弄君家世有福德君又心善也宜有佳子子如是當不終君亟求室子者輔我幸而生男昌爾之世半埜君曰而子業勝冠子勿言傍人聞之皆怪笑未四十人有子齊項旦夕爲娶婦反出不祥語令婿買妾手把刺著眼中它目痛惱可拔耶孺人益爲半埜言旦夕不休促裝令渡杭投金橐中以娣歸孺人曰此女貌羸不羸於福也居數年娣舉一子孺人置已子不愛愛娣子甚於已生人益笑其悖無何長婦舉孫人又曰孰有癡若是者孫

兒方踏肩來而憂乏嗣乎然孺人子竟天復兩歲
孫殤半埜乃歎訖曰吾非從婦計以有孺子也吾
辛苦纍積誰屬哉於是商之姻婭執友及郡人之
有聞者皆曰仁哉孺人能割情捐愛以延其後也
智哉孺人存而知亡始吾外父廷尉公爲諸生久
困中歲產落娶其冢婦於青衿時後貴家亦驟起
惟半埜及鈕孺人如鳴夷子長男更嘗艱難其介
子婦未盡知也公仕於四方所得奉半埜君爲銖
息而縷緝之孺人勤於蠶績指腫目眊未止晚至

刈穫皆往監視不以吾子亡所子娣子故稍自逸
吾觀二典二南書詩所以造端二典言公卿大夫
之相推讓二南言后夫人之逮下樛木小星房闈
近褻至與禹臯夔夷並美難矣召南卿大夫之化
也石溪先生廷尉公其有盛德歟吾於孺人徵之
也孺人今歲六十有三子二孫而上奉其老姑隣
趾關雎之應吾又於孺人驗之矣壽日親連交賀
而予爲言孺人之德有難爲於賢士大夫以媿夫
人之立朝而相媚者

壽商母劉太孺人序

予館於廷尉公之七年越之大夫先生走幣飛單
萃止於庭揖廷尉公飲之曰吾子有壽母敢賀望
齡與執爵焉蓋吾外大母封淑人陳年九十高矣
居廿歲而吾外母金夫人復稱八十大夫先生萃
於庭者走幣飛單如初酌其諸子曰吾子有壽母
敢上萬年祝而望齡侑之以詞居一歲賓客畢幣
復集如觴二母時曰敢賀邵武君之有貞母是時
劉太孺人春秋既艾而上有老姑艾視耄耋爲方

壯強耳又姑在禮不得言老觴者宜何詞哉客曰
太孺人蓋新受贊書於朝邵武君奏課高等計
車之還與觴日會拜上冠帔鄉之人莫不榮之是
一宜壽令甲馳爵於親者父在則母徒稱人從夫
也母貴於子而從夫者猶之乎爲婦也獨母在則
號爲太尊之也夫沒故從子從子故特尊贊策固
尊稱之矣二宜壽邵武君有民社宜於庶士邵武
人歌誦而推崇之宜亦若闕宮之言燕喜焉其士
庶固云壽母矣三宜壽以是三者詞於觴可也予

曰可矣未盡也徂徠之松新甫之栢生巉岨凌高
寒此所謂貞木也夫杞柳梓直上百尺旁陰數
畝逼而望之而無蒼然之色誠其爲松栢也絜之
數圍而其勢固偃蹇枝撐有氷霜風霰之態矣令
甲婦貞年艾以上者予旌予其成也爲貞母壽壽
以艾胡不可也雖然太孺人介然獨居子姓之多
纓組之盛侈言繁稱而無以得其一粲觴者空何
詞哉望齡商之贅壻仲文之密友其生平雅言隱
隱在耳計仲文在今日可伸眉一笑轟然釋其煩

慮解其沈憂而既不可作仲文雖不可作而其慰
以樂樂以忘悶可意而決也仲文之讀書土城山
也廷尉公教之方程之疾每與予課文亭子上望
見公扁舟鳴勝指山而來則色動神竦嘗謂予曰
世無不悅親之子然爲具易耳予所爲具進賢冠
腰章手板非三物者莫足悅也故其進取甚勵而
屢不售意常怱怱俾文多男子又謂多子非儒生
所安予解曰君見自佳多愈善耳然猶念之不置
今諸子又各多子而邵武君爲循令次君名於諸

生少者皆成立愈善之言驗於茲日仲文雖不遇而
以子貴衣朱腰銀戟然其容此向所謂悅親具也故曰
慰以樂樂以忘悶可意而決也太孺人業稱寡餘無足
歡而以仲文之樂爲樂以仲文之忘悶爲解憂諸賓客
用是說進諸子用客之說聽上一觴其可矣如其善祝
則請以二母爲喻

劉母壽序

予與健甫同升於鄉又同禮部舉辛卯予得告歸健甫
先予南發居三歲始詣闕自補而健甫亦先

還職校士嶺表後一月會邸中及予再歸田間健甫復以使事還覲其太夫人於是太夫人年七十矣吾二人者其行止相逐如形景而臭味聲氣歡好投合無弗同者至其有老親也又同然予最孱病健甫差強勝予最懶健甫頗能耐事予鄙劣駑緩無可用於世而健甫則精敏密察材足以集務數者爲具耳健甫旣寓帑於京師單車疾馳歸以觴太夫人冠蓋甚都簪履咸集可謂榮施於親矣而依然聯懷有不能去其親之色健甫亦聞古者

爲君使之義乎驅馳靡及思一歸而勢不可故其
詩曰豈不懷歸王事靡盬王事靡盬不遑將母蓋
古者出身事主則勢不得念私親而使爲甚今海
宇寧謐上之恩其下也周人臣有私恤則假使事
以優之仕者反以使爲懷歸將母之塗健甫自入
燕直兩易歲而再以使南皆拜母於堂其被國恩
也尤異夫受祿以養之載爵以榮之又龍周其私
恤由君以致之親者多矣健甫安何如散乎且健
甫又不得與予等予文史散吏無事寄而健甫新

遷司馬屬于時爲棘健甫家有家督而予無兄其
強病勤癩材不材三者又異予自宐廢健甫自宐
出回轅叱馭固各有當烏在其盡同哉太夫人賢
母也愛其子也大視聽強神色茂其受祉於朝未
有艾也健甫其亟行無緩以寧親志夫志寧則體
愉體愉則百祥集是固壽之道也邑縉紳之游
于健甫者與其年家子十三人合詞載爵爲夫人
壽授簡於望齡易不云乎或出或處或默或語二
人同心其利斷金同心之言其臭如蘭吾二人者

易知錄
卷之二
三
不可
抑可謂同心矣健甫而無寘異同於出處則予之
莠言庶其蘭哉